

四庫全書

集部

欽定四庫全書

文敏集卷三

明 楊榮 撰

五言古詩

題黃璿感螺卷

卧冰思王祥躍鯉懷姜詩孝行動天地簡冊垂光輝寥
寥數百年誰能踵前規黃郎當妙齡至性超羣兒祖母
忽遭疾奄奄日沈危煩渴思食螺天寒焉得之奮然獨
持筐竟向南沖池攝衣破凝冰引手搜凍泥雙足任皸

裂寸心堅不移神明默加相螺出驚纍纍於焉謝穹昊
拾取盈筐歸石井汲清泉烹煎進重闈蒼靨既脫落素
肪光離離以茲濟焦渴所思幸無違喉吻倏流潤體汗
生淋漓颯然肌骨清豁然心志怡不日疾康愈里閭咸
嗟咨王姜固云遠孝行相與齊風聲動川蜀童稚皆周
知一旦擢科第際會遭明時郎署振清風顯陟應有期
勗哉竭忠盡允矣芳名垂

送叅議陳彞訓致仕還西江

聖皇嗣大寶寬仁布新令敷此天地恩豈但及萬姓羣
臣引年者簪組從致政矧君甫七袞翩然發歸興懸車
及茲時抃舞拜恩命念昔永樂初遭逢亦何幸擢官鳳
凰池寵榮日斯盛九載秩既終仍官侍萬乘超遷佐方
岳任重德益稱湖湘何渺茫嶺海亦綿亘甘棠垂蔽芾
愛遺召南詠茲言還故山閒佚愜素性春光正明媚花
柳紛相映都門集故交為別復胥慶知止奚所懷退休
志先定倦翼恣林栖潛鱗樂川泳載賦歸去來回視青

天迥

題敦孝堂

三山有孝子父歿方七齡母氏不二天齧指誓清貞辛
苦撫孤兒織紉營厥生子年既已長奉養心益誠拾穗
供盤飧採薪時自烹己身恣飢渴母食恒充盈溫清在
冬夏問候當雞鳴陸績既懷橘王祥曾卧冰藩伯重褒
獎里閭揚芳聲一旦母嬰疾慄慄增戰兢稽顙禱北辰
願以身代更至誠感蒼旻母疾遄安寧漉器每親滌僮

僕不欲令扶養復三載母歿哀不勝悽愴霜露降怵惕
春雨零華堂揭敦孝允矣當此名况今有賢嗣翰苑沾
恩榮孝行格天地斯言誠足徵

雲林書屋為曾蒙訓題

青山何崔嵬白雲在林端石澗滴清響松風生夏寒幽
居一何靜塵俗澹不干簡編恣舒卷怡然心所安正襟
味道腴意適遂忘食名教有樂地豈徒此盤桓最哉崇
德業令譽垂不刊

送余侍講還鄉

西昌有佳士力學工文章才名動江右馳譽翰墨場科
第膺妙選秘閣蒙恩光制作播當時古人相頡頏金石
諧雅奏千莫發光芒優游玉堂署意氣獨軒昂論議振
風采英聲重輝煌竭來偶嬰疾歸思何遑遑陳辭伏闕
下承恩還故鄉征帆掛薰風祖餞潞水傍睞言成遠別
握手心徬徨倒此雙玉壺相勸各盡觴懷思向何處萬
里吳雲長

題菊送鍾郎中歸省

秋景已過半嘉節近重陽
鮮鮮籬下花粲粲吐芬芳
韶玉每舒白槭金盛傳黃
清含九天露冷傲三秋霜
郎官告歸省折贈壽母觴
寫圖寓深意還期晚節香

送憲副徐廷謨復任雲南

徐君冰雪姿早歲承恩光
日近明聖主接武鵷鷺行
易冠自巍峩繡斧何輝煌
英聲震百僚風采動四方
烏臺皎明月白簡飛清霜
乘驄擬桓典攬轡期范滂
餘子匪

傳匹古人堪頡頏一朝寵命頒持節向南荒外臺永鑑
懸層霄秋隼翔邊氓各安妥豺虎俱遁藏遂令滇雋間
兵民樂以康及茲報政成入覲登明堂錦袍照雲日珂
珮聲鏘鏘奏最愜輿論言歸理行裝曉出黃金臺酌此
白玉觴晴景耀晨旭好風散微涼綠樹敷繁陰靡蕪吐
幽芳道路阻且脩別離情更長願言保清操終始恒不
忘剛貞比松栢歲晚逾蒼蒼要遣遐陬民拭目俟鳳凰
九載定高擢秉軸當廟廊

送河南按察使包德懷之任

聖明敦化理一念惟勤民綏輯良有要任官貴得人百
職當畢舉况茲風紀臣激揚匪易事表率在一身登庸
或有昧庶務將紛紜明廷秉至公所以慎選掄包公東
浙彥早充觀國賓拜官內臺署冠冕垂纓紳屢看持憲
節巡歷宣皇仁丰采耀冰雪霜威凜秋旻英聲播中外
烜赫今幾春竭來膺峻擢輿論殊歡欣司憲泣河洛拜
恩出楓宸玉音自天降文彩照三辰晴日絢祖席涼飈

拂行塵臨分更贈言何以話情親外臺位望崇當使政
令新此去必勉旃民俗廣咨詢官曹去蠹弊里閭息煩
呻坐令冤抑理庶俾惠澤均慙予寄寓亮未能竭忠勤
願子盡乃職上報聖明君明明樹嘉績奕奕揚清芬

送大叅連士平考績還江西

連氏舊名閥奕葉聯簪纓衣冠照雲日詩禮相繼承君
昔英妙年意氣摩蒼冥肄業庠序中交游皆俊英麗澤
互滋益斷金堅素盟羣疑日分割志篤學乃成閩藩棘闥

開多士推先登驥足騁周道鵬翮快雲程東風遂高舉
黃甲書姓名我我獬豸冠出入蒙恩榮繡衣炳文彩栢
府揚英聲稜稜曉霜肅皎皎秋蟾明九載陟薇垣持操
固有恒江西古大藩自昔稱地靈湖江屬襟帶控引甌
與荆君至贊旬宣翼軫騰光精恩惠洽黎庶田野安以
寧芄芄抗稻黃藹藹桑拓青簫鼓千萬家絃歌十三城
善政既云就考績來天京相逢話心素適慰離別情九
重奏最罷遙遙復南征維時大火流漸覺天氣清梧葉

墜金井涼颿奪炎蒸侵晨出都門別酒聊共傾膏車促
言邁分手情不勝官河動雙槽彷彿鵝鸛鳴鯨波息奔
駭萬里如掌平到官及秋暮黃菊正芳馨爰與衆君子
報國殫忠貞勲崇譽望高當與廬岳并

送葉太守于淵致仕還鄉

君昔英妙年秀發居芹宮與予金石交至性敏且聰講
習資麗澤才氣如長虹業成早膺貢鼓篋登辟雍六館
推何蕃餘子難與同丹山下鸞鳳矯翮思騰冲翩翩五

色羽炯炯雙玉瞳來儀向朝陽和鳴何噦噦維時際熙
皞賢俊俱登庸造羽列駕驚接武偕夔龍喜君荷優擢
列職粉署中邦禁屬分掌讞獄惟至公澄潭湛寒水皓
月行秋空清譽動朝野明良慶遭逢遂分銅虎符作郡
蘇疲癯五馬向嚴城一路春融融朱幡照雲日黃堂藹
仁風治績著當世不羨黃與龔丁艱歸故鄉號泣摧深
衷服闋出墓廬促裝覲九重受命牧金華永繫全始終
惠澤洽黎庶政化沾隣封及今際聖明正好殫厥忠云

胡宦况微思作香山翁懇懇乞歸田所願得俯從飄飄
還山雲去去南征鴻末夏暑方盛槐柳陰正濃送君出
都亭祖餞惜匆匆況予就衰老有志懷匪躬涓埃補河
岳歲久難為功感激受深眷戰兢如莫容退休固所欲
但念民未豐顧茲倍憂切夙夜恒忉忉臨歧與君別感
此情無窮

送刑部尚書施禮之南京

明經早登第文采如鳳麟軒昂軼人羣際遇當昌辰

持三尺法履歷皆要津雅操厲冰雪冲襟盜陽春南京
倚注重北闕恩命新鳴珮別瑣闥揚鞭出城闈眷我久
同朝臨分意彌親贈行欲有言繾綣難具陳所願慎刑
罰欽哉服皇仁

送太守李公載赴任大名

清時重民牧出守需才良每當銓授際遴選循舊章李
君臺端彥令聞如珪璋風采動朝著廷臣交薦揚大名
畿內地委寄非尋常拜命沐天恩旌節何耀煌五馬出

都門行行泣黃堂疲癯待甦息奸慝應避藏宣此涵育
仁慰彼綏柔望吾聞狄梁公勲業著有唐當年守茲郡
遺愛人不忘懷哉瞻雲念忠孝垂耿光君喜有雙親咫
尺隔太行迎養良可遂詎用增離傷民安蒙惠化親壽
樂時康願言繼前哲千載同流芳

送劉僉憲之湖廣提調學校

荆楚在南服土曠民物稠承平幾百年俗化追虞周庠
序育英俊教養恩惠優近來振鐸者學政殊未脩聖明

急先務夙夜屢此憂大廷綸音降俊彥旁敷求分命典
文軌因時振風猷劉君我同志學行誰與儔歷仕三十
年白髮今滿頭鸚薦愜輿論經邦有深謀佇看揚英聲
飛隼橫九秋勸懲肅規矩昏惰無逸游坐令小大材異
日咸可收巍巍衡陽山瀾瀾江漢流勗哉全令德聲望
同久留

送僉憲陳廷嘉之廣西提調學校

聖朝尚文治建學崇師儒四方樂熙皞聲教達邇隅西

廣古荒服民夷相雜居皇仁若天地雨露皆涵濡云胡
數載間庸才濫師模俊秀失教養學校多榛蕪陳君玉
堂彥擢仕登要途煌煌五色勅錫命恩寵殊于茲振風
化豈憚道里紆英聲動蠻徼絃誦溢里閭坐令荒遠邦
俗比鄒魯區允矣稱厥職千載揚芳譽

題墨菊寄徽州太守崔用章

粲粲黃金花結根依竹石傑立風霜中常有好顏色我
知畫者意所尚非粉墨持之贈故人豈但情可適芬芳

固幽澹雅操本清直所願長愛玩何須掇英食安恬守
冲素以保君子德榮華及晚節壽祿天所錫

送高唐蕭知州迪括復任

金川素多彥接武仕明時蕭君更超卓夙抱經濟資射
策黃金殿拜官青瑣闥十年職獻納侍從多光輝一朝
荷遷擢出守臨滇池惠化洽黎庶芳聲溢邊陲讀禮杜
門久遠人勞去思邇來泣高唐日益勤撫綏絃歌聲比
屋禾黍秀連岐行春乘五馬露冕還褰帷坐令一郡間

民物俱恬熙昨者來報政從容拜彤墀天府書最績承
恩又言歸方今急掄賢廟堂重詢咨君才信不凡薦達
良有期茲行勿遲遲勉旃勵操持會應丹書召高步追
龍變

題竹贈潛溟

竹以比君子所貴在幽貞況當永霜間而有琤琤聲掩
逕翠藹藹拂雲玉亭亭坐令炎囂月頓覺涼意生我欲
截為管持之獻明廷鏗然中律呂永繼韶鈞鳴

持敬齋為南昌經歷周文遠作

吾聞古君子主敬心不移戒懼乎未覩慎防乎自欺所以造至德俯仰無忸怩周君務脩省兢業恒自持凜如履氷際惕若臨深時發言戒輕妄周旋思中規一朝荷恩命贊政江之西郡齋揭華扁動靜體無違惓惓夙夜間謹此心術微以茲方寸中皎皎生光輝門庭杜私謁田野爭訟稀美哉持敬功遠大由此躋勉旃保終始峻擢應有期

題菊贈郡守

三徑富秋色粲粲黃金花姿美鮮可掬香幽靜逾嘉孤
芳與晚節端足為時誇我欲將其英遠寄賢守家泛之
綠玉觴可以益年華采采不盈袖青雲天路賒

四老圖

有跋

聖人建皇極歛福錫羣黎所以多壽考往往登期頤淮
淝有望族奕葉繁且滋偉矣譽髦士冠豸何魏魏嚴親
在高堂壽筭踰古稀諸父亦已老白髮俱成絲兄弟式

相好迭奏頌與簾煜煜常棣花鬱鬱連理枝安居日無
事列坐相怡怡綺食薦雕盤綠酒盈金卮芬敷芝蘭香
炳耀斑斕衣美哉同氣樂世俗難與齊四皓居商山寂
寞歌紫芝何如此四翁共際昇平時豈殊康衢間擊壤
含哺嬉 監察御史合淝吳鑑以其父與叔俱高年無恙
命畫史繪四老圖來請題於予予聞吳之先世以忠厚
相承而鑑之父與諸弟咸克敦孝友為遵義遵道之民
宜乎壽富康寧而有以享聖世皇極之福也故樂為之

書

送楊弼學錄之南京

涓流達巨海拱木干雲天諒此匪朝夕滋長必有年揚
生倜儻姿卓卓懷高騫特達自有時淬礪志益堅及茲
官太學出入偕英賢長養棟梁器濬滌山中泉宏遠方
自此奚容嘆寒瓊

池閣

豫章城南曲勝地何逶迤喬木翳平野流泉引深池池

上建高閣翼然似翬飛窓戶澹虛敞簾攏鬱參差與逐
涼颼至影隨明月移泛泛蕖荷艷蒼蒼楊柳垂松聲度
靈籟竹色涵華滋鷺浴出深渚魚游動連漪對此愜幽
趣况當九夏時登臨恣休偃頓覺消炎曦悠然風雩興
良與靜者宜先生天下士道德人共推承恩早休致林
壑閑自願當暑恒憤懣那堪向衰遲幸有賢方伯經營
慰心期全勝杜陵客不費草堂貲詩成勞遠示千里來
京師開緘想風采三復感故知看君適優逸愧我猶羈

縻願因南飛翰題贈寄深思

王氏世德堂

本大末逾茂源深流益長清門積德厚世遠斯流芳彼
美三槐裔移家文水陽前人侈餘慶後嗣蕃且昌眷茲
朴叟賢教子敦義方學成擢科甲列職登朝行薦膺褒
寵貴御勅煥龍章秋官顯封秩雲林耀冠裳令子荷恩
眷歸省拜高堂晝遊衣宮錦倍覺生輝光始知德善報
高情動江鄉

送張紀善世昌致仕歸鄉

鳥倦歸舊林魚潛依故淵物性尚如此人道豈不然張
君清流彥早歲志精專德行務脩省問學深窮研一自
永樂初擢桂偕羣賢親藩列清秩輔導心乾乾清操挺
松栢豈為桃李妍設醴眷彌厚匡正情愈堅流光倏已
邁奄忽三十年顧惟衰老至白髮已盈顛鵬程宜遠舉
素志未獲宣封章達九重乞身返林泉聖情特矜憫詔
許歸園田朝出薊門道暮登潞河船鴻鵠遂遠適不為

羈絆牽迢迢閩關路遙望渺南天親賓共迎候歡然相
後先溪山澹清曠風月藹無邊壺觴適優逸杖履愜盤
旋願言慎調攝壽祉永綿綿

題夏木重陰圖送侍讀陳叔剛歸省

遠山鬱岌堯近壑巨磅礴冥冥煙靄生霏翠半空落壁
立勢轉奇屏開淨如削中有嘉樹林高低相間錯隱隱
虬龍姿嶢嶢見頭角驚風振巖巒雲氣杳綿邈枝葉森
相樛團團似帷幄林邊一兩家門巷遠城郭茅亭俯澗

泉蹤迹幸此托心遠絕塵囂地偏甘寂寞愛此重陰敷
頓令暑氣薄俛仰適幽襟陶然有真樂羨子昔間居青
山舊為約抵今歸定省登覽應如昨衣錦愜高情揮毫
紀新作毋為久淹留早待翔寥廓

送巡撫趙侍郎日新復之西江

先皇御寶歷致治思隆平治化已孚洽海宇咸安寧尚
慮田野間未息愁嘆聲於焉重巡撫選任須老成趙君
人中彥早歲負才名郎曹十餘載泣政公且明以茲荷

遷擢秩亞天官卿西江古名藩控引粵與荆地廣民物
繁強弱時相陵巡撫受寵命厥任良匪輕鋤奸屏貪墨
重賦寬苛征妍媸罔永鑑輕重歸權衡遂令十三郡黎
庶總安生聖明繼天位制治遵典刑舊人一委任終始
無變更君益勵厥職夙夜殫勤誠及茲屬秋序述職朝
玉京胥晤未盈月匆匆復南行涼飈奪炎暑道路天氣
清遙知下車日列郡懽相迎所期重諮諏綏輯慰羣情
無嗟獨賢勞遠大良可徵

繼志堂 有跋

鄱水有名宗自昔重脩德善源悠且長滔滔衍慶澤及
今數百年子孫尤繁殖彼美後來人留心事經籍景仰
徽國公惓惓慕芳跡敬恭奉雙親怡愉見容色椿樹蔭
庭中萱花映堂北兄弟樂且耽友愛自相得風雨夜連
床壺觴日同席和氣藹門庭恩意洽疎戚倚歟繼述心
龜勉在朝夕大賢固云遠流風宛如昔今子登宦途名位
漸輝奕尚期保厥終餘慶奚有極 鄱陽朱氏本徽國

文公從叔父桓之後其先自新安徙信之永豐由永豐而鄱陽相傳八九世皆能以詩書禮義為教忠信孝友為尚卓然為邑里首稱今廣州府推官克潤乃其裔也嘗慕平流風遺韻而期有所光振者比來京師間袖其所扁繼志堂詩卷謁予請題因賦此歸之而并誌于後云

劉節婦

御史江玉琳母

烈女不二夫古道誰信然懿哉昔共姜守志能自堅至

今栢舟詩耿耿垂簡編偉矣百世下有此江母賢年當
二十餘奄忽失所天子生甫八月勵志矢弗遷辛苦事
織紵嚴恭奉其先一心抱貞白皎若明月懸延師教孤
子夙夜惟勉梅子幸登巍科冠豸方騰騫受封荷御勅
光寵何昭宣遂令邑里間稱羨無間焉婦道既無愧母
德亦已全作詩紀貞節庶為千載傳

送按察使郭智之福建

聖朝建百職風紀任匪輕外臺掌一面郡邑瞻儀刑自

非英特流是職良難勝郭君京畿彥擢桂當妙齡遂幾
獬豸冠正笏居明廷丹心照白日逸氣凌青冥乘驄道
途肅攬轡汙濁清鷹隼戾霄漢歛使凡鳥驚以茲荷優
擢出入被恩榮朱衣面黼衣錦帶腰間橫奉命鎮關陝
惓惓效忠誠邈候息烽警民物俱安寧暫息九霄翮高
秋再騫騰七閩在南服憲度虛鑑衡喜君膺薦拔告別
今戒行風清殘暑收雨霽涼氣生畫船泛清波一日千
里程暮發廣川驛朝過下邳城蘇臺月先白錢塘潮正

平行行抵閩粵下車振英聲林藪斷豺虎海島絕鯢鯨
令行羣邪伏心正公道明定知惠愛洽不負知己情永
保松柏操歲晚長青青

九峯歸趣為主客郎中王濬作

名門多俊英家住九峯側君才更超邁務學探六籍伊
昔未仕時朝夕看山色啟戶雲霞紅隔窓烟樹碧一從
遊宦途寓跡在京國分曹屬春卿勵操尚永蘖擬攄寸
心丹可柰桑榆逼乞身遂退休辭闕中感激引領望九

峯懷抱何所遶飄飄峯上雲無心沛膏澤戢戢林間鳥
倦舉冲霄翼眷茲景物佳雅志自相得松風四座清蘿
月半窓白掃石撫朱絃焚香玩羲易利名了不關塵累
覺消釋高風誰能如企彼陶彭澤

環秀堂為御史李安題

田西美山水面面景物同層巒峙高標疊嶂開芙蓉湛
湛碧玉流清光涵太空蜿蜒勢迴抱恍若虬與龍構堂
據清勝秀氣於此鍾浮嵐藹窓戶黛色侵簾櫳凭高一

翹首如在瑤環中
惟子孕靈秀卓卓
超凡庸我豈侍明
主屢沐恩波濃
勗哉崇令德光價
昭無窮

題蔣院判秋林書屋

美人構書屋卜地
遠且幽中有桂樹
林蕭蕭黃葉秋涼
聲滿窓戶暑氣覺
已收端居弭塵慮
展卷窮冥搜俗客
不能到經生意綢
繆講習資麗澤德
進業日脩懷哉古
聖賢存心異常流
不為一身計每繫
天下憂得時顯吾
道尚仰伊與周

榮壽堂為江西吳潤布政作

榮名固難致得壽尤不常自非積善家二美疇能當延
陵遺忠厚世澤深且長君乃仕明時守郡稱循良雙親
享祿養七袞猶康強顏酤絢晴旭鬢白垂秋霜綸誥自
天降寵命垂清光椿萱藹秀色喜氣充華堂烏帽映珠
翟楚楚華身章子職既無愧君恩自難忘矧今仕方岳
嚴慈壽且康具慶諒非偶無乃世德臧懷哉古人言作
善天降祥

送揚方中歸省

子乃保家器孝行人罕儔雙親隔南北兩抱離別憂昔
來省嚴君數月居神州夙夜罄子職愛敬隆以周慈闈
屬遐念官舍難久留於焉束行裝復上江陵舟瞻仰孤
飛雲悵別心悠悠茲行諒脩阻況值時未秋暑途慎自
保去去安能休到家慰親畢毋忘箕與裘

存仁堂為孫太醫題

人為萬物靈具此惻隱心存之有其要勿為物欲侵是

心一云喪不異獸與禽孫氏世業醫利濟恩惠深施藥
不圖報恪守厥祖箴以茲種陰德芥視千黃金春意妙
流動盎然滿眉襟杏花爛雲日橘葉敷繁陰懷哉蘇與
董此術無古今願言保終始允矣人所欽

題訓導滕愷小畫

有元失其鹿天下紛逐之高皇仗劍起豪俊歸網維謨
箕屈羣力勇者無所施思昔下金華滕君先見知禮之
置帷幄制勝屢出奇玉堂職絲綸薇垣贊樞機恩榮有

如此遭遇古所稀故人在田野寫此寄相思長林聳霄
漢挺挺金石姿坡陀帶烟霧密葉陰下垂二君久捐世
高風尚魏魏展圖一撫玩彷彿如昔時賢哉滕氏裔謁
我求新詩逝者不可見感此增嘆悲

送憲副王裕之山東

聖明重風紀簡任須才賢惟才政績舉惟賢德澤宣外
臺表郡邑二者寧可偏王君荷美質擢桂當妙年衣繡
立霄漢我多侍日邊風采動百僚能聲人共傳屬茲公

道開鸛剡橫九天於焉被高擢驄馬行翩翩山東古齊
魯海岱遙相連民俗尚淳朴儒風猶藹然君今貳憲紀
臨政須勉旃中心抱虛白雅操持貞堅凜凜曉霜肅皎
皎秋月懸令德一終始踐履惟乾乾庶以罄厥職行見
祿秩遷

水竹居為王學士題

君子尚貞白塵累皆棄捐寸心何所似璧月澄深淵一
從辭故鄉高步青雲邊鳴環侍鑾坡儼若瀛洲仙歲月

忽如流華髮今垂肩興言思舊林彷彿瀟湘川萬竹密
如簣下有石澗泉圖之當座隅撫翫心所憐亭亭立蒼
玉湛湛涵清漣對此足自適高歌淇澳篇永言保貞操
勿渝金石堅

慶裴脩撰母八十

人子願親壽今古心所同賦命本於天所願寧悉從懿
哉裴氏母執德柔以恭相夫務勤儉訓子親和熊婦道
與母儀二者備厥躬所以獲天祐具此壽福隆夫貴子

亦顯乃荷鸞誥封冠帔何輝煌髮白顏如童年今屆八
袞目明耳猶聰華旦稱壽觴綺席生香風翩躚五綵衣
拜舞春融融冀母踰百歲更祝繁禧崇

送袁忠徹尚寶致政歸鄉

碧空下涼露玉樹生秋風朝回別行客目送南飛鴻青
冥浩無際去去不可從懷君先大夫夙昔遭竒逢潛邸
識真主不羨漢呂公列職清華地最沐恩寵隆一朝忽
仙逝惕然動宸衷推恩錫世祿不獨榮厥躬接武登鳳

池垂紳侍重瞳累績陞少卿出入丹禁中侍從歷四朝
眷遇期有終齒力尚未衰歸思何匆匆封章荷俞允拜
命辭九重故鄉有先隴鬱鬱羅青松歲時伸祀禮誠意
潛感通忠孝求無愧令望垂不窮

忠孝堂為江西馮都指揮題

綱常立人極本自天降衷為子當致孝為臣當效忠有
美馮氏肩世濟揚武功若翁熊虎姿赳赳振英風秉心
一何良惟謹彞倫中親喪居墓廬哀哀三載終痛心生

白髮洒淚枯青松至今匡山人稱道無不同倭奴昔為
寇鼠竊窺海東公領偏師出奮勇當前鋒力戰不旋踵
恥作偷生庸捐軀死王事精誠凌白虹繼承有賢嗣允
矣能亢宗名藩位連帥名爵方日崇高堂揭華扁先德
斯昭融大書良史筆休烈垂無窮

題畫梅

江南殘臘際萬卉俱凋零惟有寒梅花粲然自敷榮操
與松筠固色同冰玉明西湖幽興遠東閣新吟成以茲

脩潔士往往資怡情薊北少栽植無由覲華英畫圖一
披閱頓覺心神清寒梢淨披拂素艷淡輕盈疑聞暗香
度似覺疎影橫子乃愛蓮裔喜結逋仙盟得此愜珍玩
不殊獲瓊瑛高齋殘雪霽如在孤山行豈伊形模妙比
德良足徵永願保貞白庶用慰平生

梅月為給事中謝莊題

一枝羅浮玉芳姿澹輕盈明月何皎皎照此冰骨清遙
疑暗香度近覺疎影橫懷哉君子操潔白可同情

五言律詩

贈韓院判

舊業軒岐術承家復幾年
濟人咸仰德醫國共推賢
花滿仙林杏香分橘井泉
九重恩眷厚四海盛名傳

鑑湖一曲為史院判題

聞道山陰景湖光一鏡秋
遠涵晴日動迥帶晚煙浮
花發連堤樹帆歸隔浦舟
承恩方顯擢何許賦歸休

陽山看碑和胡祭酒韻二首

江郭日方東羣山映碧空路經林影外人在畫圖中野
老談時泰居民樂歲豐昔聞堯舜日治化與今同

二

夜宿山中寺林軒對客開松梢新月上竹逕好風來刻
燭催詩句持螯勸酒盃高談禪榻畔清興亦幽哉

題麥舟圖

自古多豪傑曾懷隘八寰一家賢父子高誼重丘山盛
事傳天下英名滿世間今觀圖畫裏氣概孰能攀

題江湖勝覽

正是昇平日遨遊屬少年
琴尊三峽月烟雨五湖船
紫陌聯冠蓋紅塵醉管絃
應知清興遠蹤跡遍山川

思親堂

莫報春暉德翻成隔九原
音容嗟已逝夢寐想猶存
蒿里秋霜冷萱闈夜月昏
淒涼千古恨揮涕不堪論

志訓堂

夙昔承先訓孜孜重義方
音容長若覩夢寐詎能忘
體

魄歸冥漠泉臺隔渺茫過庭言在耳洒淚向羹牆

題挂庭卷

種植由先世秋香尚滿庭瓊柯交碎影金粟帶餘馨雨
露霑天澤根株占地靈重榮應有自當戶正青青

題鄭員外山水

江西名畫史曾說稚川賢筆落天機到圖成景物妍青
山開第宅綠樹帶雲烟有待閒居日臨風漱石泉

次西昌楊學士贈太守張鳴玉詩韻

五馬自光榮南還兩月程江雲隨去棹汀雨濕行旌客
路歸時遠公堂到日清龔黃多善政努力繼芳名

送尹御史

驄馬金臺下承恩報政歸祖筵瓊作醴仙珮繡為衣水
國荷香遠關河樹色微料應南去路五月振霜威

題鄧伯道棄兒圖

中原遭喪亂兵馬正交馳念弟須存嗣謀妻遂棄兒人
情終有歎天道豈無知此日觀圖畫揮毫謾賦詩

虛菴為劉咸副使題

四壁清無際疎櫺面面通獨懷茲室異迥與此心同燕
坐羣喧寂消閒萬慮空懸知能受益華扁思無窮

送羅儀範照磨赴肇慶

垂白方膺薦之官逼歲除晨裝趨驛路畫錦過鄉閭草
綠辭家日榕陰到郡初慎毋輕幕士滿腹有詩書

送戴肅知縣赴建安

佐政臨花縣哦松早著聲勤勞書宦蹟遷擢被恩榮客

路三關去郎星五夜明山城思茂宰黎庶定相迎

題雲岑書屋

書屋青山裏雲深翠欲流小橋通曲澗遠樹帶平疇地
僻人稀到心閒景自幽學成須致用未必久淹留

竹鶴雙清圖為西楊學士題

脩竹琅玕直仙禽迥立清扶疎三徑色嘹唳九臯聲勁
節風霜老貞姿玉雪明朝回賓客靜吟對獨含情

遊東郭草亭

美景懷東郭重遊樂盛時
盃香瓊作醴花暖錦成帷
雅奏娛人久新鶯度曲遲
興濃還有約來歲副深期

挽焦中書母

鄉里推賢範閨門仰令儀
遽遺三釜養空抱九京思
寂寞堂夢淒涼薤露辭
總知賢嗣好今在鳳凰池

五言排律

壽少師吏部尚書蹇公

日月光華旦風雲慶會辰
昌符開景運帝德著深仁
天

為諸賢哲時當翼聖神列星還降昂維嶽復生申漢水
清無比巴山秀絕鄰人鍾川嶽粹地產廟堂珍少負匡
時學曾充觀國賓謀謨深啟沃禮樂盛敷陳已冠英華
選端登要路津奮庸熙帝載論道覺斯民天府馳聲久
宸衷眷注頻銓衡明藻鑑梁棟倚高旻共仰包荒量咸推
治泰臣化樞資密勿士類荷陶鈞登貳三台重調和二
氣均參苓儲已舊桃李樹猶新徵角招相悅鹽梅味獨
真四朝需碩輔一代見賢人位極功彌茂年高行益淳

三尊身具備五福日駢臻搜契勲堪繼松喬壽可倫坐
忘溫室樹吟對漆園椿美矣顏如玉皤然鬢若銀壽鄉
人不老化國日長春初度逢茲旦迎新屬此旬瑞光現
南極蕃錫下楓宸鵲鵲繁禧集洋洋喜氣勻金爐飄翠
縷綺席疊文茵燭焰搖紅蕊簾鉤釣翠筠充庭來賀客
列座宴朝紳几案盈方丈肴羞貴萬緡賜來內膳美斟
出上尊醇子姓皆蘭玉孫枝總鳳麟雲霞裁舞袖絲竹
協歌唇拜獻情偏至趨承禮更循慶門元有積盛福豈

無因我昔懷清德于今踵後塵追隨蒙礪谷度識經
綸有駭思陳悃非才愧効顰願言增壽算與國永無垠

圍獵

聖主宵嚴駕蒐田正及時郊原霜氣肅關塞日光遲狐
兔潛蹤跡鷹鷂厲羽儀虞羅彌數澤獵火亘山陲雜遝
連千騎張皇飭六師弓彎明月滿旗動曉雲垂祝網龍
輿駐歸營鳳蹕移三驅遵古典千載示弘規

瑞菊

草木應多品均沾雨露恩君家培厚德異瑞兆秋根可
愛雙花艷寧知一萼分合歡含細瓣並蒂吐清芬甘谷
宜同美東籬未許論開時當令節看處映芳尊好客俱
能賦騷人亦綴文羨茲霜下傑種向日邊園對景葵心
在食英蘂味存流傳誇衆口華采動詞垣

題沈崇知縣明恕堂

花縣為郎久人歌卓魯賢存心應不昧推己自無偏水
碧冰壺靜天清玉鏡懸疲瘡歸惻隱鰥寡屬矜憐不為

私情掩寧容物慾牽奸回能獨覺好惡自同然鑑物知
無惑求仁術有傳絃歌清韻遠桑柘綠陰連遙想安民
績西山石可鐫

送尹叅議之福建

出仕清時久朝紳喜共推丰神何卓犖志氣亦瑰奇美
質名邦產才華治世資光韜和氏璧秀挺鄧林枝蚤歲
游侯泮潛心下董帷一經登虎榜三策對龍墀入侍楓
宸早遷官棘寺宜平反無所隱直道不容私孤鶚終當

薦良駒豈久羈躬逢千載遇名達九重知宸翰銓陞日
藩方佐政時拜恩偏感激受任敢稽遲閩海千山路春
風二月期江花含宿雨嶺樹隱朝曦父老歡迎返官僚
想設施寧論瞻表率直欲贊雍熙好似鳴陽鳳長傾向
日葵優游宣治化豈弟慎威儀源潔流斯遠形端影自
隨宦成當勿怠責重更精思常袞勲宜繼韋丹政足師
廟廊猶有待竹帛可前追運海鷗鵬翼凌寒松栢姿盛
名須振舉素操尚堅持仰體掄賢意毋忘贈別詩始終

能敬懋庶不負疇咨

重遊東郭草亭

雨霽纖塵淨春和萬景妍
天門紅映日宮樹翠含烟
散步從東郭追歡憶去年
自慚聯閣老幸喜接羣賢
花影侵文檻鶯聲近綺筵
時和兼物遂觴詠興悠然

挽胡學士

閎覽簪纓遠才華自夙成
彤幃遺舊德黃榜占魁名
卓犖金閨彥瑰奇玉署英
謀猷膺主眷風采照人清
得句

珠璣粲摛文錦綉明詞源驚倒峽步武羨登瀛共詫分
蓮貴爭傳視草榮鋪張昭聖治黼黻際隆平殿馬追星
駿宮衣疊雪輕大官供膳美內帑錫金盈紫誥揚先澤
青綾直夜更光華承寵渥獻替盡忠誠清問臨雙闕高
名重兩京宸衷方倚注薤露忽歌聲痛哭憐交契追懷
愴聖情褒封增卹典勲爵耀銘旌旅櫬孤舟路鄉山萬
里程滄洲秋草碧宰樹暮雲橫逝水空長嘆流年謾自
驚惟餘同列者回首淚沾纓

挽蕭用道長史

詩書崇闕閱詞藻紹弓裘隱迹聲華著閒居行義脩朝
廷隆至治玉帛正旁搜擢相親藩重掄材寵命優校讐
開石室忠藎徹宸旒梁國鄒枚並西都賈董儔四箴勤
翊導八事贊謀猷忽罷長裾曳俄為遠塞遊一投終莫
返孤疾詎能瘳行橐金錢少遺編翰墨留藍田生片玉
蟾闕步高秋仕路行當顯泉臺惜竟休青山新勒石宿
草舊封丘悵憶斯文舊哀歌涕泗流

五言絕句

題四景圖

春至多新水
瀾漫四望同
却疑霄漢裏
還有泛槎翁

二

萬疊峯巒秀
遙空散火雲
興來聊極目
佇立向斜曛

三

玉露生涼風
江空兔魄多
分明挂樹影
誰道是山河

四

寒山高百尺老樹傲風霜更欲彈碁坐秋聲九夏涼

雙牛圖

二首

碧草微茫處江天欲暮時想應農事隙蜀牧自相宜

二

遠岸長林下牛馴意態閒不須歌扣角歸去卧柴關


墨蘭

二首

九畹人何在湘江空自流向來紉佩處烟雨不勝秋

二

空谷誰能問幽芳獨占春不知湘水上何處吊靈均



文敏集卷三

欽定四庫全書

集部
文敏集卷五

詳校官編修臣裴謙

中書臣劉源溥覆勘

總校官中書臣朱鈐

校對官學正臣常楫

謄錄監生臣劉廷勳

謄錄監生臣鄧以伊

欽定四庫全書

文敏集卷四

明 楊榮 撰

歌行

壽少師蹇公

岷峨鬱蒼蒼巴江浩洋洋陰陽二氣互流盪精英翕聚
生賢良憶昔元祚衰天造正冥昧公生癸卯冬適際真
元會賦此英偉資天意豈無待一朝發軔登魏科鳳凰
池上承恩波彩毫彤管日簪侍禁密優游榮寵多先皇

首擢為冢宰天下人物歸權衡綱維百職肅儀表調劑
四海臻和平偉哉金石操挺矣松栢貞聲名滿夷夏事業
垂汗青四朝歷仕荷深眷兩扶紅日升霄漢經綸邦國
運嘉謨耿耿忠勤不知倦從容職寅亮秉軸居廟堂元
化屬叅贊斟酌隨低昂皇穹錫佑在元老年踰七袞愈
康強禁城梅玉清香吐綺席弘開具尊俎葱葱瑞氣滿
華堂煜煜斑衣膝前舞稱觴獻壽來羣仙錦袍玉帶光
相連共誇天地產良佐柱石邦家非偶然嵩嶽昔降神

生彼甫與申詩人發歌詠簡冊猶昭陳況今聖皇位宸
極不比周宣更化新盛世光嶽氣完厚鶴髮龐眉多縉
紳仰止岷峨峯崔嵬彩雲裏盼彼巴江流悠悠去無已
為公歌此度遐齡坐閱昇平介繁祉

題竹石泉坡贈南京劉給事中

天孫織錦機邊石架若雲霞成五色乘槎仙人攜之歸
騰入滄溟深莫測波濤蝕齧千載餘上產百尺青珊瑚
馮夷捧來為我獻文彩照耀扶桑烏君不見石家小兒

肆行暴競巧誇奇真可笑高枝大葉似此稀不待搜羅
能自到堯舜在上來遠人貢獻盡卻奇與珍我今有此
不自惜持以贈子何殷勤歲寒別我金臺下春滿南都
到官舍此行樹業當何如須與珊瑚比光價

送孝廉童景和還鄉

我家雲際峯子居玉溪側溪雲相望百里間共聽溪流
看山色我忝遊京國別家凡幾霜丘園子晦跡林泉足
徜徉今秋忽領鄉書薦邂逅都門欣會面為言堂上有

慈親白髮如絲身尚健今晨奏疏陳衷情詔許還家畫
錦榮人生何如奉親樂婦進甘腴兒調羹君恩如天尤
罔極欲報涓埃那可得抒忠盡孝臣子分重係綱常諒
須識我別庭闈音問疎綵服亦欲相追趨若過閩山到
鄉曲為我先寄平安書

題張判府恒山書屋

恒之山相疊峙幽燕以南亘萬里蒼厓高出幾千仞古
稱北嶽中天起但見日月來東西蒼藤古木啼青兕張

公築室讀書舍其下閉戶不出識者寡左圖右史日相
親下筆文詞襲班馬胷中更有治安書披腹琅玕欲傾
寫一朝選入遊上庠文彩燦爛雲錦章許身報國竭忠
盡佐治聖世如陶唐秉心精白恒自守高誼如公世罕
有竭來輔政居建邦化民已見風俗厚生平節操如秋
霜禮法雍容睦僚友春風夜坐政事堂思看舊書那能
忘白雲縹緲在眉睫綠樹掩靄遙相望君親兩立不可
置惟願壽考如天長恒之山渺何許南閩遠望青天高

更有幽人時仰止

永藥堂為龍明叙作

萬物誰獨清惟有玉壺水羣卉難悉數藥心良最苦人
生高潔勵貞操可使芳名照今古鹿門遠孫居古文鳳
凰池上超凡羣堂上令母年七十孀居自昔揚清芬辛
勤撫孤習詩禮遣贅從師脫簪珥熊丸有訓屢資勞膏
沐無心寧復理只今三釜荷恩榮萱花雨露逢昇平悅
闡華扁署永藥煌煌史筆昭懿情豈不見昔王素所至

廉名馳仕路不獨當時水蘂聲千載高風爭景慕而家
令母何其賢淑德早向鄉邦傳再歌一曲勵民俗以茲
願續栢舟篇

金臺別意圖贈宋士德照磨復任松江

東吳名郡雲間最山水鍾靈此其會九峯崑崙秀凌空
三泖春流互縈帶就中宦績相後先只今郡屬惟子賢
洒如清風立翠竹炯若綠水開紅蓮昔年初捧除書至
父老欣欣總懷惠閭閻鷄犬寂無驚田野桑麻藹交翠

公庭晝閒案牘清終歲不聞敲扑聲家家院落絃管溢
處處寒燈機杼鳴政成迴首逾三載考績京華見風采
故鄉姻好情逾深宦路交遊心不改盍簪道舊能幾時
承恩南去催還期臨歧握手興不盡悵望雲山傷別離
雲山微茫渺何許為託幽懷向毫楮一段閒情入畫圖
千里相思若親覩子今磊落非尋常政化覃敷名譽彰
東吳民庶重懷仰滿眼烟樹皆甘棠殷勤祖帳送行色
遠大相期須努力需看萬里自飛騰雲霄好展扶搖翼

崆山遠思圖贈章貢太守張鳴玉

庾嶺西來知幾里其下蜿蜒走章水章水盤迴到郡城南有崆山相對峙層巒疊嶂通杳冥儲珍毓秀多空青造化生成挺奇異氣勢磅礴鍾神靈茲山屹立何高壯翠壁丹崖鬱相向黛色蒼蒼望不窮巖竇凌空幾千丈黃堂太守方盛年讀書掇科才且賢皇華光彩照海內玉節時時下九天昨來拜官守章貢五馬恩榮世所重皂蓋風雲自繞旋丹霄日月長瞻捧去歲雙旌朝帝京

金臺相見不勝情，征驂初指龍沙路。
歸鞍已向虎頭城，分攜去住心何苦。
幾度相思未由睹，謾憑毫素染崆山。
想像天涯渺何許，懸知從容退食時。
獨對茲山覽秀奇，晴烟暝靄相恍惚。
瑶林琪樹紛歲蕤，我因斯圖寄遐想。
引睇南天神獨往，高名期與此山齊。
令德應知人共仰，小畫為韓院判題。

君家畫品世無匹，昨者滄桑忽相失。
題詠空傳名士詩，揮洒猶存伯兄筆。
知君繼志真才賢，故物忍令終棄捐。

遂教好手巧為此拂拭毫素生雲烟春山如黛春水綠
芳樹重重繞華屋杏花日暖卧狸奴蒲葉風輕飛屬玉
我亦平生林野情忽見新圖心目清何時訪君向幽處
一棹烟波江月明

題松鶴

青田之姿真不羣玄裳縞毳何繽紛有時清唳向寥廓
一聲直上橫秋雲孤松亭亭高百尺松梢盤挈倚石壁
翛然來此立多時軒昂欲展雲霄翼何當結巢松樹間

朝來飛去暮飛還
間隨坡仙度赤壁
不逐子晉遊緱山
伊誰寫此最奇絕
高堂忽見心神悅
安得蒼崖置一雙
舞影秋空弄明月

一片秋意為史院判題

昨夜西風起蘋末
長林蕭蕭葉初脫
夕陽流水澹無波
玻璃沈浸青冥闊
斷堤古岸遙相連
彷彿疑是鑑湖邊
黃花未發含清露
白鳥欲度橫蒼烟
人間此景何瀟灑
獨對新圖意閑雅
安得扁舟泛綠漪
坐看翩翩海鷗下

題韓御醫山水圖

幽人襟度何瀟灑時來踞坐長松下天邊翠壁高嵯峨
石上垂蘿已堪把興來看山不厭山仰視浮雲不可攀
流泉隱隱出巖谷長疑激石鳴潺湲只今作官居顯職
日日承恩登禁掖還山未得但看圖一段閒情付秋碧

題王知事蒼梧親舍

蒼梧之山高崔嵬蒼梧之水青於苔朝雲捲雨凝不散
化為五采天邊來知君攬結入肺腑綺語藻詞生筆下

一從泮水樂優游，聲名早已登天府。
竭來閩藩，今幾年元戎幕下，開紅蓮庭闈，道遠不可見。
披圖展玩，心悠然蒼梧遙遙幾千里，引睇沅湘，隔烟水。
慈親鶴髮雙鬢，倚門日日長如此。忠孝由來難兩全，嗟君心事誰能憐。
丈夫有才，誓許國，要令事業垂簡編。我時趨京赴西掖，因君此圖，情轉劇，相思應在玉堂中，明月滿簾天咫尺。

西山精舍

西山疊翠峭且奇，山前流水清漣漪。
美人築室得幽勝，

獨攬秀色褰書帷紅塵不到柴闌靜綠樹陰濃晝日遲
書聲伊吾出林杪時有好鳥鳴高枝花雨飄香入醺醪
松濤送響來琴絲以茲遊息信得所況有童冠相追隨
每於大化探至理登山臨水應忘疲邇來有籍通仙府
別却舊業趨京師匆匆相見長干道命我為題精舍詩
祇今去典常山教尚有西山猿鶴思

題張真人鵠峯清暑圖

鵠峯嵯峨幾千尺屹立江南半空碧仙家正在龍虎深

林壑翛然絕塵迹茅屋俯瞰峯之阿石泉飛洒浸垂蘿
向來六月不知暑空翠滿襟涼氣多道人時把瑤琴理
流水高山少知己問誰載酒泛中流來聽清商間宮徵
我生性嗜山水幽忽見此圖清興留何當從子問真訣
周覽八極尋丹丘

題方尚書蘆雁

黃蘆蕭蕭波渺渺六花飛入江天杳遠渚長林落葉空
平沙斷蹟行人少嗈嗈鴻雁自隨陽飲啄飛鳴古岸傍

幾點遙橫闕塞遠數聲迥隔雲山長乃知良工妙無敵
筆攬造化留真迹摩挲此畫賦新題崔氏已無空嘆息

題吳尚書山水圖

青山蹇我半空立萬疊芙蓉紫烟濕峯前昨夜春雨深
繞澗飛花水流急隔嶼人烟凡幾家一徑蒼苔石磴斜
溪迴路細長芳草月落幽林歸早鴉山深洞口行人少
白雲飛墮青山杪恍見滄洲樹色微如聞古寺鐘聲杳
茅簷日出鷄犬喧十里烟光連遠村依稀乍疑篋簞谷

彷彿自是桃花源乃知畫者通玄理點染天機筆鋒裏
尚書愛此欣得之素壁高堂見山水人間美景不易尋
此圖直比雙南金玉堂展卷慕清絕爽氣蕭蕭風滿林

賦西山送教諭周公明赴長洲

西山屹立何雄哉倚天盤地高崔嵬壯氣崢嶸逼太華
秀色縹緲連蓬萊蓬萊咫尺臨天闕遙對茲山最奇絕
龍樓鳳閣接飛雲玉殿瑤堦照晴雪周君文采儒林英
蕭蕭白髮沾恩榮宦程初赴天官考教鐸還為吳郡行

今晨告別何草草祖帳離筵薊門道回望西山疊翠屏
萬古青青應自好長洲花發春日初綠水蕩漾青芙蓉
臯比坐講有餘暇還念西山相憶無

壽萱堂為王都御史題

高堂有母今垂老鶴髮慈顏喜長好愛日惟存慰母心
階前多種忘憂草願將此草喻慈親一度春風一度新
日傍花邊呈彩服時依叢畔贈金鱗公從早歲承恩眷
時向烏臺掌邦憲祿養深期志不違宦情但祝親常健

雲冠霞帔簾幙深慈親壽考多歡心華觴累進浮香氣
輕輿幾度來花陰慈親安樂萱長茂九天雨露栽培厚
有待他年畫錦還拜舞花前慶親壽

題夏尚書橫披山水

青山綿亘何盤盤空翠杳靄連岡巒千尋黛色雲中出
萬疊芙蓉天際看懸崖峭壁真奇絕百尺飛泉洒晴雪
石磴高低入渺茫嵐光遠近相明滅其中茅屋臨水開
野橋曲澗紛縈迴抱琴客向誰家去鼓棹人從何處來

百花爛漫爭妍媚
遠樹參差帶新霽
初疑盤谷隔風烟
忽訝桃源在塵世
人間此景那可逢
嗟哉畫史何其工
摩挲展玩不忍釋
為寫清興思無窮

溪隱為章氏題

幽人昔隱清溪濱
溪中流水光粼粼
常時濯足風湍曉
幾度蕩槳烟波春
高懷對此真澹泊
嘯詠滄浪心獨樂
竹寒沙淨小窓幽
酒醒夢迴月初落
幽人乘化知幾年
溪邊勝景還依然
臨流有客想芳躅
况復脣嗣多才賢

當時品題遺翰墨展卷悠然仰先德誰云杖履迹已陳
文采風流照溪側我亦平生慕勝遊武夷曾迴九曲舟
何當為掃溪頭石坐看一片冰壺秋

孝友堂為呂尚書題

名家本出藍田裔積善生公廟廊器堂中列鼎奉慈親
膝下聯芳見諸弟公昔家居侍母傍朝朝暮暮在高堂
清觴漱灑蟻浮蠟綵服連翩雁作行自從致身事明主
一片丹心誓相許晨趨雙闕列朝班夕望孤雲憶慈母

昨者承恩畫錦還擁蓋持麾西入關諮詢到處盡臣職
拜舞喜得瞻親顏春暉煜煜聯華萼鶴髮龐眉宛如昨
頃篋迭奏承親歡自古天倫有真樂知公祿養榮且豐
壽富康寧誰與同作詩願頌君陳美芳聲永世垂無窮

野橋春霽圖

東風吹花新雨晴微茫山影開雲屏泉聲有無隔幽竇
嵐光遠近排空青小橋橫枕西溪側過客何由分野色
日華潏潏因物榮芳草萋萋為誰碧五更朝下承明廬

天香滿袖登遊車十年未著謝公屐似與岡巒識面初
歸來摩挲醉吟目不唱商顏紫芝曲何處有山如此圖
移近蓬萊翦濃綠

林泉清趣圖

有序

凡處富貴功名炫赫而能安乎素履不以浮靡累其中
者此其為人必有瑰奇磊落之資清竄絕塵之想卓然
超乎庸衆者也今右軍都督府都督同知沐公世本元
勲承閥閱之舊襲簪紱之華蓋未嘗以富貴名爵有所

矜街居常退然自下歎焉若弗勝此其志趣豈不賢於人遠哉予世家建寧公之先人黔寧昭靖王在國初時駐節建寧撫鎮七閩號令嚴肅政行恩施士民懷慕予少時蓋已熟聞其德量之宏才識之偉矣及予以科目登朝又幸與公之兄今太傅黔國公暨公與公之弟駙馬都尉胥晤於是知公之伯仲皆以勲勞才望受知當時策名藩方聯姻戚里實皆先世積累之厚非偶然也公自滇南入朝京師其將歸也屢索予詩以識別予惟

公能超然物表無所繫累雖在貴富顯榮之中而懷蕭散恬澹之志乃令善畫者作林泉清趣圖以贈且為歌詩以系之嗟夫謝安以晉宰輔為四海之望而懷別墅之樂裴度以身為唐安危而慕綠野之勝則是圖也亦豈非公之志也哉詩曰

公家先世國元勲舊有威名海內聞至今功烈尚如昨三鳳文采皆超羣公為仲氏尤瑰傑自少藩方持節鉞標格渾如玉樹清丰姿迥若冰壺潔平生不受塵俗牽時時高

興在林泉閒來與客縱歡賞碧雞金馬民安然昨者來朝
雙闕下九重眷顧增光價萬里欣逢入覲初幾度從容退
朝暇茲乘驛騎賦旋歸贈以斯圖慰遠思長林薜薜淨塵
俗石泉泠泠洗襟期如公風度今能幾况復勲名世無比
不徒惠澤被遐荒要遣聲光照青史紅亭酒酣日向曛三
疊驪歌未忍分揚鞭上馬重回首還見蓬萊五彩雲

題李參議轅門清暇圖

李君磊落英妙年萬里青雲先着鞭致身早振成均譽

列職曾推宦路賢自從佐郡蜚聲久田野熙熙真罕有
千樹烟火藹桑麻萬落人家蔭榆柳只今叅贊在轅門
防秋猛士如雲屯詔書畫下笳鼓靜羽檄夜發風雷奔
有時調兵奉天討瘴雨蠻烟淨如掃惟慳爭推籌策良
官僚共說謀謨好以茲身閒心亦樂時時談笑青油幕
秋空斥堠絕烽烟夜月邊城息枹柝況今大將有山公
持麾擁節收成幕中從容煩寄語勉旃報國垂無窮

賀許編脩父壽日

名家自是簪纓裔種德綿延今幾世遐齡可比竇家椿
賢嗣宜方鄧林桂竭來初度屬昌辰鶴算今逾七十春
遙想瓊筵開盛宴衣冠滿座來嘉賓玉堂令子尤歡慶
緘寄詩詞遠伸敬紫誥曾頒已賜官綵衣新製還相稱
伊予千里仰芳聲未及登堂舉壽觥尚期黃髮膺嘉祉
更沐天朝雨露榮

劍池書館為鳳陽熊知府題

豐城寶劍天下聞紫氣曩煜光照昏一朝劍去蛟龍合

池水深碧今猶存
熊君書堂在池側
彷彿當年子雲宅
紅簾綠幙對高秋
細雨青燈坐終夕
翩然振翩起朝端
青瑣闥中列上班
功成又轉二千石
坐取功名如等閒
有時夢入鄉園樹
還憶臨池讀書處
早晚承恩畫錦還
劍池魚鳥寧相負

題陳德遜青山白雲圖

若有人兮尚貞獨
為愛青山寄高躅
青山盤盤江水涯
白雲英英滿空谷
昨日攜書遊帝畿
白雲縹緲紛相隨

中宵乍覩從龍處故里猶懷伴鶴時東風三月春正好
白雲有意還山早多情更賦還山吟願與山人樂熙皞

寄翰林編脩龔良器

我憶初年在閭里於爾嚴君重交誼坐論夜雨碧窓前
醉舞春風落花裏盟心托好真忘年往來出入相後先
情深直擬金蘭契意厚寧如膠漆堅一從辭家上天闕
平步雲衢依日月只今已是三十春兩地相看鬢成雪
自慚碌碌衰懶餘君恩未報將何如故山迢遞隔江海

飛雁不帶南來書玉堂退直重相憶幾度逢人問消息
光榮已喜沐恩封老大偏憐少筋力翻思昔日辭家時
爾生數月方孩提滄波東去白日逝門牆桃李皆成蹊
向來大比屬庚戌喜爾翩然應時出策名飛步冠羣英
餘子紛紛孰能匹詞垣三載承寵光御勅恩頒增焜煌
銀章紫綬貴尊甫霞帔珠冠榮北堂人生際遇有如此
莫遣光陰枉拋棄尋常畫錦不足誇遠大勲名且須冀
由來學問無終窮好將經史精磨礪促裝更囑來京早

摩挲老眼看騰冲

題馮敏山水圖

鳳池仙客天機精
筆端點染真天成
想當適意自盤礴
呼吸造化含元英
欣然寫此得佳趣
雲水微茫帶烟樹
左擎右攫森相攫
恍若蛟龍飛不去
懸崖峭壁不可攀
宕崑直入霄漢間
幽亭卜築在深處
塵氛不到清晝閒
是誰瀟散事遊賞
短棹輕舟自來往
晚風不動碧波平
潏灔寒光映蘭槳
斯人偉矣真罕儔
飄飄儼若坡仙流

披圖一覽發清興彷彿萬里江南秋

送建陽何貳尹景春復任

建溪佳致著南土文物衣冠近鄒魯考亭夫子接洙源
道德輝煌照千古哲人一去三百年流風餘韻今依然
桑麻蔽野藹春晝絃歌比屋聲相連賢丞自是俊髦士
佐政琴堂勤撫字令克同心足有為女織農耕日無事
竭來考績上帝京銓曹書最揚芳聲曉辭雙闕瞻龍袞
晚唱驪駒傷別情南風吹雨洒行路酌酒都亭話心素

隱隱征輪日下歸
瀟瀟匹馬河橋度
最君此去休遲遲
到官正值新秋時
道傍棠樹多翠色
堂下雙松森四圍
更從父老詢民瘼
撫慰貞淳祛詐惡
公庭事簡訟不聞
犬卧綠茵花滿郭
方今聖主旌循良
屏除貪墨投遠方
好堅清操保終始
他日行看膺顯揚

重慶堂為御史崔仲玉賦

君家積善肇慶源
雲初奕葉森相傳
一門四世總無恙
自是五福能兼全
人間具慶亦云樂
況有重闈齊矍鑠

桑榆入暮駐流輝黃菊逢秋粲奇萼堂中大父八袞餘
更聞祖母壽福俱朱顏曄煜見神彩白髮飄蕭霜滿梳
過庭詩禮重嚴父清夜扣熊賴慈母庭前椿樹傲清霜
堂北萱花沐時雨羨君卓犖方壯年由來孝友自天然
禮闈擢秀並多士憲府乘驄推獨賢昔曾衣錦歸故里
鳳勅恩頒重褒美銀章白簡相焜煌霞帔珠冠綢文綺
一堂和氣春融融子拜雙親孫拜翁雕盤品食備甘旨
斑斕五綵迎東風嗟哉重慶世罕有偉矣君家德深厚

勉旃忠孝兩無虧
歲歲高堂介眉壽

送翰林脩撰連景賢歸建寧省墓

長空淡淡秋氣涼
金臺紅葉飄清霜
詞林有士荷恩寵
衣錦翩翩歸故鄉
故鄉追述在何處
雲水微茫隔烟霧
一尊酒盡情更賒
三疊歌殘留不住
綉鞍金勒五花驄
洋洋意氣如晴虹
官河初泛過瀛海
眼前景物應無窮
岱宗磅礴亘鄒魯
人物衣冠自今古
梁山奕奕神禹功
千載奇蹤在西楚
錢塘月落潮正平
吳歌越語相間聲

買魚沽酒且為樂，吊古興懷無限情。
蘭橈挂掉疾如矢，風正波平日千里。
望中閭嶠白雲邊，笑指鄉關在伊邇。
維時溪上梅花開，花間喜迓扁舟回。
綺筵交錯列華饌，紫霞歛灩浮金杯。
錦衣絢耀已如此，光被松楸及桑梓。
焚黃既畢早趨朝，忠孝兼全孰堪比。
嗟予衰老白髮多，濫叨厚祿居鑾坡。
三朝自幸沐優渥，涓埃未效將如何。
今晨送子轉悽惻，聊寫長歌壯行色。
到家故舊若相過，為道年來重相憶。

送江副使志堅復任淞江

都門朝下日方燠嘉樹蒼蒼藹新綠紅亭送子復之官
頓有離情千萬斛憶昔初遊鄉校中書窓夜讀清晝同
共期情誼託膠漆肯教蹤跡分西東我慚列職近丹陛
子繼登科擢高第鸚鵡剡橫飛出九重纂脩共處清華地
金閨通籍承寵光丹墀簞羽連鷗行朝回傾倒足為樂
幾見庭樹飛秋霜書成峻擢天顏喜繡服輝煌燦霞綺
十年風采動朝端富有聲名滿人耳外臺六載非偶然

平生志節久愈堅
淞水東西數千里
咨詢多道使君賢
竭來考績上京國
書最榮歸動行色
暫時酌酒須盡歡
明日雲山杳相隔
最哉此去毋躊躕
淞中黎庶望回車
願言冰蘖保終始
平安時寄南來書

送廣東惠州陳太守還任

京華三月春欲老
柳花明覺春好
故人五馬促行裝
清晨取別何草草
為言昨日朝明廷
三年考績承寵榮
九重纔覩蓬萊曉
萬里復向龍川行
念昔先皇選民牧

愛子才華美如玉一時被命同幾人五色龍章絢人目
平生力學頗自珍試推豈弟懷斯民羅浮山高豐水濶
草木盡得霑皇仁茲行還領魚符去須信閭閻久延佇
枕擲葉暗荔枝紅竹馬紛紛滿行處

文敏集卷四

欽定四庫全書

文敏集卷五

明 楊榮 撰

歌行

送呂少卿升常歸省

先生宋代名臣裔簪紱蟬聯輝奕世潛心力學紹前聞
碩望清才更誰似一自英年領薦書騫騰獨步青雲衢
暫淹侯類師儒席還擁行臺使者車手持憲節僉風紀
盛有香名滿人耳勁氣寒飛楚樹霜襟懷湛澈西江水

移官閩憲益馳聲政成超擢佐廷平釋之自信無冤濫
戴胄偏能適重輕昨來入覲明光殿奏績從容荷深眷
綵雲仗裏綴朝班瑞雪光中侍恩宴天語丁寧復舊官
茲晨拜舞出金鑾錦袍香惹爐烟暖玉珮聲搖曙色寒
羨君紫誥推恩久褒典榮親世稀有松楸鬱鬱霜露深
欲薦蘋蘩酌尊酒翩然承詔遂南歸晝日煌煌絢錦衣
人生得意有如此富貴功名願不違宦遊何幸逢昭代
況復明良際嘉會話舊空驚白髮生攄忠諒有丹心在

平生託好最相親
官路俄經三十春
棘寺知君體欽恤
廟堂顧我乏經綸
驪駒明發催程早
祖席都門且傾倒
殘臘遙辭紫禁門
還官重上金陵道
輔治由來需老成
華資今已亞諸卿
此行珍重慰時望
有待嘉謨答聖情

雪窩為苗修撰題

昔聞讀書泮池上
一室臨池頗虛曠
室邊面面種梅花
惟愛寒香來紙帳
有時雪後天復晴
皎皎夜月當軒楹
梅花雪月共一色
室中湛若冰壺清
欣然把書映雪讀

雪光照書同秉燭
况茲素月復流輝
四壁熒熒如削玉
一從錢塘徙畿甸
擢科入侍金鑾殿
時看雪月宛猶昨
只有梅花苦難見
當時此室名雪窩
別後相思魂夢多
月華雪色諒依舊
南枝消息今如何
已知襟懷尚清景
雪消月落空梅影
有待枝頭結實成
試作和羹為調鼎

送都御史熊槩之南京

曉風吹花飄紫陌
陌上青青楊柳色
繡衣驄馬何輝煌
祖帳臨歧送行客
客初拜命出都門
意氣偏承明主恩

霜威凜凜孰敢犯狐兔斂迹鯨鯢奔強摧弱植安田里
間間處處謳歌起還朝入對重敷陳九重顧盼天顏喜
南京憲臺席久虛特承寵眷荷新除玉壺酒盡意不盡
欲別不別仍躊躇知君此去肅風紀要使聲華滿人耳
不見當年攬轡流千古芳名照青史

送甌寧大尹章文郁復任

吾鄉風土冠七閩建甌二邑相比鄰清和之風此融結
山水秀異民心淳風淳俗朴無乖戾從古迄今稱易治

況當聖世仁化行令長人人盡良吏章君自是錢唐彥
早入成均與髦選驥足高騰迥出群牛刀小試初為縣
治成綽有昔賢風人方卓茂與魯恭晨霜翳蓋躬行學
春雨乘車出勸農六載守官如一日藹然仁惠聲洋溢
來朝仍著尚方履課最重書考功筆關樹生涼宿雨晴
還辭北闕向南行雨露濃濡雙袖濕江風遙送一帆輕
邑中耆老相望久有待來臨如父母長途風景秋正佳
馬上看山莫回首我皇注意在愛民守令于今務得人

勉旃終始樹嘉政褒命行看下紫宸

送陳必恭叅政考績還雲南

陳君家住錦江里居傍好山千仞起鍾靈孕秀在斯人
少小留心事經史一從領薦上神京成均肄業超群英
黃甲題名沐光寵烏臺列職揚清聲日持白簡趨丹闕
勁氣稜稜凜霜雪平生心事孰與倫皎若澄潭湛秋月
繡衣一出山嶽搖翩翩鷹隼凌九霄輜車按涖帽貪墨
封章奏劾驚藩僚更聞攬轡向吳土狐鼠豺狼遁無所

掃除奸弊一以空要使高名照今古一朝叅佐居黔中
薇垣頓覺春融融遐荒草木被膏雨閭閻黎庶歌仁風
昔年報政好顏色此日重來頭已白懸車未遂歸老心
匹馬還看別京國旗亭楊柳何青葱送君南去情無窮
願推仁政治荒服莫教中道隳成功願予同郡托交誼
衰老猶慙侍楓陛聖恩他日許歸休同看錦江山色翠

送太平知府姚政之任

禁城漏徹天門開紅雲捧日東方來仙蹕聲傳六龍至

明堂朝罷千官回，羨君卓犖多才智。此日榮看荷恩意，
手分銅虎任專城。袖帶爐薰出丹陛，賜來寶勅何煌煌。
龍文五綵生輝光，旗亭車馬集冠蓋。祖筵酒泛葡萄香，
溽溽涼露浥芳草。道上塵氛淨如掃，蘭橈曉發潞河濱。
回首雲山隔瓊島，秋深水落波不興。白蘋紅蓼爭鮮明，
雲連齊魯黍初熟。雨過秦淮山更青，道傍雜遝森童稚。
共逐雙旌日邊至，閭閻已喜樂雍熙。宛若春陽發輝媚，
黃堂宣化敷聖恩。撫綏黎庶旌仁賢，和風拂拂藹生意。

明月皎皎行青天況君昔嘗效勞績一寸丹心炯虛白
早從絳郡著能聲兩入樞庭贊籌策地官分職衆所推
敬敷五教昭民彝翩翩一鶚上霄漢駢駢五馬趨南畿
朱幡皂蓋照雲日勲名坐與龔黃匹公庭無事清晝閒
絃誦聲連萬家室古來郡守非不多惟有循良名不磨
勗君此去慎終始再聽民間襦袴歌

題曹義編修花木翎毛圖

同雲黯淡歲華逼老樹輪囷雪初積瘦蛟起舞凍欲僵

一鳥歸棲頭已白中山有物明月精睢盱相顧如有情
天寒獵罟不復出靜倚叢薄無人驚樹傍枸杞枝裊裊
搖落之餘見應少葉在猶如翠羽滋實成尚綴瓊珠小
嗟哉植物胡不同榮枯開落誰能窮晴窓看畫坐嘆息
默識乾坤造化功

送禮部郎中蔣廷暉致仕還鄉

薊門二月春晝長有客翩然還故鄉為言衰邁已七袞
乞身幸已辭明光憶昔年華正彊盛工書深得臨池興

遠師羲獻爭清妍近法歐虞擅遒勁龍飛九五永樂初
姓名早已登薦書拜官雖列鳳池上載筆每向詞林趨
毫端日日傳恩旨綸綍輝煌播遐邇乘閒縱意時一揮
多在人家畫屏裏後來遷職尚書郎內庭如舊承寵光
白金文綺頻有賜三十餘年鬢髮蒼顧予自昔同供奉
青眼相看意逾重只今別我遂歸休千里湖山入清夢
祖筵酒滿黃金卮盡醉休嗟臨路岐他時倘遂懸車願
定過錢唐話別離

送田萬陶教諭之沙縣

田君性質淳且良早年力學攻文章
曉窺芸簡碧窓靜夜對蘭燈清漏長
平生卓犖有高志淬拭青萍不輕試
韜藏寶匣幾經年時有輝光動星緯
秋風藩省棘闥開揚眉吐氣爭先魁
九重霄漢翔鳳羽雲程千里馳龍媒
一朝飛步上京國擬向彤墀獻三策
日華五色過眼迷乙榜登名衆皆惜
聖恩掄選重才賢成均三載加精研
誰知富貴自先定科名特達非偶然
拜官再向黉宮裏

得此欣然為親喜封章懇款動淵衷錫命南行近閭里
都門草綠春日明臨歧使我不勝情官河水滿快征棹
指日諸生相拜迎東風吹雨潤芹藻泮水優游景逾好
親闈迎養足歡娛遙想藍輿到官早顏童髮白八十齡
年來況喜身康寧公餘娛侍有真樂不羨富貴兼功名

送大尹謝仲廉之沙縣

東風吹花舞晴雪正是京華夏初月上林日暖散鶯聲
似與行人送離別翩翩鳬舄出九關一尊酒盡添朱顏

丈夫慷慨別知己仗劍寧辭行路難憶昔君初擢科第
際會風雲多意氣綉衣綢綵立青霄白簡飛霜侍丹陛
豈知利鈍亦有時得失往往常相隨只今承命宰百里
況是閩南風俗奇喜君卓犖負高節世態從教尚炎熱
玉壺秋月烟虛明金井寒泉自清冽茲行正好展才猷
時將民瘼勤諮諏夜深無犬吠村巷春到有農耕綠疇
夫耕婦織各安所比屋謳歌歌父母三年報政著勤勞
佇見芳名同卓魯由來邑令任不輕君行莫傷離別情



秋風若有燕鴻便應好緘封遙寄聲

送顧都御史致仕還鄉

憶昔與君同射策兩鬢相看如漆黑流光迅速不可拘
轉眼蕭蕭頭總白君初釋褐宰花封桑麻百里春融融
歎從鶚薦上霄漢手持玉斧乘青驄英姿勁氣獨超絕
不好尋常事容悅三春栢府凜嚴霜六月江南洒飛雪
銀臺進秩曾幾時擢官都憲蒙主知四方顒昂想風采
百寮震肅瞻威儀聖恩優老古無比一朝勅賜歸田里

清名已見重當時況復光榮善終始漢家解組有二疏
都門相送多軒車高風卓卓振寥廓夾道人稱賢大夫
君今高步踵前軌不使先賢獨專美歸來林下更優游
錦綉輝煌照桑梓蹇予衰老思退休才薄應慙今尚留
冥鴻何日遂高舉九霄接翼橫清秋

送中書陳宗淵致仕還鄉

天台山水鍾靈氣人物挺生多秀異陳君夙出流輩中
襟宇春容富才藝能書能畫莫與肩揮洒毫素人爭傳

芳聲早歲聞京國雅志不得栖林泉永樂之初領高薦
一時同召皆英彥倬直常居白玉堂承恩日侍金鑾殿
從此飛騰際盛時廿年染翰鳳凰池炯炯雙眸明似電
蕭蕭兩鬢白如絲詔許歸休娛晚節買舟即日還東越
故園遙指赤城霞片帆輕度滄江月我與相知為獨早
見君少壯今衰老送行難盡舊時情聊復長歌寫懷抱
到家正是菊花天把酒東籬興浩然惟有丹心常戀闕
時時飛夢五雲邊

題紫芥圖贈同知王朝佐

中園百蔬雨後長紫芥新香味偏爽錦文繞葉光陸離
金縷攢花色鮮朗莫嫌氣烈俄驚噫滌滯消煩功獨廣
紛紛春韭與秋菘那得與之相比倣徽州貳守最賢明
厚撫煢嫠薄自養晨食暮膳無重味此甘腴勝熊掌
勤勞民事自忘疲不似庾郎同偃仰康侯擊節信民言
我亦為君加嘆賞繪圖相贈雖若微託此聊將寄遐想
方今廉吏盡登庸不限內朝并外壤願言終始務清修

佇見徵書降天上

題竹泉石坡贈宣城錢教諭

古來何人善畫竹湖州太守眉山蘇二公已去數百載
每嘆絕筆人間無此圖幾竿何洒落生氣滿森動寥廓
胸中不有真琅玕筆下那能發竒作崢嶸老石莓苔青
叩之似作金玉聲虛竇玲瓏暗泉滴深根盤結微雲生
子今振鐸宣城去為拂新圖寫新句梅花未發柳未生
持此聊將歲寒意不用截取長竿釣玉璜不用裁為律

呂鳴鳳鳳惟應殺青著書比班揚廣文之官雖冷夫何傷

翠筠軒爲黔國公子沐可觀題

世人見竹愛者稀子獨愛種當軒墀長稍密葉自瀟灑
虛心勁節同襟期拂雲高並青霄直秀壓琅玕繞簷碧
千竿颯颯風雨聲四面陰森冰雪色蒼然滿眼如瀟湘
敲金戛玉相鏗鏘虬龍露角帶春雨鳳凰振羽鳴朝陽
有時攜客翫佳景滿地扶疎散涼影掃石彈碁白晝長

鈎簾對月清宵永有時截製紫鸞笙希音吹徹鈞天清
空中似引飛仙度翠翹綠珮何輕盈塵氛不到淨如洗
幾回吟嘯霜天裏蔣逕寂寥何足論淇澳猗猗自堪擬
君家慶澤流無窮種德應與種竹同繩繩後嗣盡英傑
撫綏夷落推元功羨子才高踵前躅早有芳名動南服
願言長養資汗青留紀清朝世勲錄

重慶堂為曲靖知府晏毅題

堂中慈母雪滿顛况是大母尤高年福祿康寧姑婦樂

旨甘備養孫曾賢人生重慶有如此孝慈同萃一門裏
綺席懽承綵服鮮綠醅香泛金樽美彤幃皂蓋綰銀章
慈竹陰連萱草芳錦衣屢得拜家慶幾迴庭戶生輝光
知君久作青雲客御勅曾看侈褒錫寧將宦遊悅親顏
直遣夷氓沾聖澤顯揚已喜振芳聲更兼祿養承恩榮
願殫忠孝保終始不負高堂鍾愛情

送李叅議復任

藩維之任實匪輕古來重此良足徵咨詢州牧載虞典

旬宣江漢垂葩經李君早歲乘驄馬煜煜才名滿都下
蒼隼橫秋振羽翰白簡飛霜肅朝野一朝受命叅閩邦
聖皇德化能宣揚政平訟理息愁嘆坐令八郡生春陽
竭來報政上京國官舍相逢慰相憶暖風碧草三月春
綠酒紅亭送歸客蒲香酒熟下車時再施惠澤安黔黎
心如玉雪保終始廟堂峻擢應有期

送從弟尚文復任南京吏部郎中

憶昔少時居故鄉兄弟相親恩愛長碧窓燈火照經史

肯以暇逸虛流光一朝歟動青雲志泮水傳經汝來侍
夢草春吟每得詩聽雨夜眠常共被是時愛汝才且賢
靜觀羲畫窮先天陰陽變化悟消息為汝指授加精研
歲逢己卯仲秋月我獨攀桂登蟾闕鵬程浩蕩遂騫騰
翰苑編摩愧疎劣一從別後難與同喜汝攜書來辟雍
日下聯輝想華萼雲邊接羽看飛鴻時從官舍話衷曲
顧戀情深如手足領薦欣題鴈塔名為郎喜作天官屬
十年粉署政績多彤庭奏最承恩波官階已齒大夫列

煌煌紫誥頒鑾坡曾懷先隴多荒草拜上封章歸祭掃
始憐別我去路遙旋喜辭家到官早于今又是五載餘
重來慰此情鬱紆官舍論心未逾月都亭又擬歌驪駒
關河迢遞渺南北潞水鍾山兩京客百年兄弟皆過半
此日相看總頭白匆匆且莫傷別離金臺會面恒有期
秋風驛路多歸使時遣平安報汝知

別仲子讓歸鄉省母

常聞七十古所稀我今行年當此時鏡中朱顏已非昔

鬢邊玄髮半成絲汝來官舍茲十載定省晨昏恒不改
趨朝上馬每親扶退直還家立相待承顏養志希前修
要使吾心百不憂撫摩弟妹恩愛厚應對賓朋情誼周
家庭綽理協規矩僮僕歡欣無間語眼中塵俗不相關
幹蠱承家應賴汝今晨拜別還故鄉祇為慈親在北堂
劬勞鞠育思報德豈憚關河歸路長到家正是小春節
綵服登堂慰離別鄉園桑梓須敬恭先隴松楸宜拜謁
兄弟惟敦手足情閨門禮法在持循睦宗恤衆恒留念

敬老尊賢勿厭頻我家種德自先世忠厚相傳貴相繼
還將經史細研精莫遣箕裘業荒廢汝行日遠思日深
去後平安多寄音殷勤侍母有餘暇重到京華慰我心
汝來京侍養已十年小心敬慎夙夜不怠治家接人
罔失禮度足慰老懷今以弟錫來乃欲歸省母雖命
汝行而汝之庶母弟妹及諸親舊咸弗忍舍汝者皆
由汝平素孝友誠敬之所致實非偶然吾雖欲留旦
夕侍左右然汝念母久違孝心誠切不可沮遏乃賦

長歌一篇以勗汝行汝且暫歸以安母心尚期促裝
重來以慰吾懷庶幾子道兩盡汝其服膺勿忘也

題竹贈登州太守楊頤

浴鳳池頭雨露濃波濤翻硯飛墨龍倏忽變化騰太空
蜿蜒影掛尺素中初疑吐霧春濛濛崢嶸山角雲雷從
徐觀滿座生清風凌霄勁節冰霜容葛陂昔日留遺蹤
至今勾漏思仙翁羨君久典千里封琅玕萬箇藏心胸
歲寒之操期相同長才他日須登庸簫韶九奏重華宮

竹雪書房為畫士戴文進題

戴君舊業家錢塘幽齋刺種青篴簞冰森玉立鬱蕭爽
珮珂時動音鏗鏘一林遙接淇園綠萬箇如臨渭川曲
涼宵白晝風月清翠影重重覆書屋四時佳致迥不同
況茲清絕當嚴冬朔風吹雪滿空下凝梢綴葉相玲瓏
素娥冉冉來雲表皓鶴翩翩舞林杪是時掩卷一凭欄
清興滿襟應不少恍如玉壺照八窓牙籤玉軸生輝光
閑徑便宜同蔣詡映書更覺慕孫康一從寄跡京華地

翹首山房想初志陽春桃李任紛紛勁節貞心自無異
何人為君寫此圖故鄉景物渾不殊興來展玩對立久
一點塵埃窓外無

送修撰楊壽夫致政歸鄉

幕收司令大火流金井涼生梧葉秋玉堂詞客歎衰老
振袂翩然思退休封章曉上五雲裏恩命旋頒倍忻喜
香飄紫殿拜龍顏日轉西清別知己顧予同邑又同窓
少小論交情誼長一從筮仕列中禁南北迢迢天一方

君從泮水歌芹藻化雨春風起枯槁烏紗白髮三十春
一榻寒氊願終老幾回受命司文衡南宮藩省推公平
由茲薦剡上天闕擢任詞垣沾寵榮先皇龍馭升天後
國史恭修喜承詔書成進入蓬萊宮聖德神功永垂耀
褒陞華秩錫瓊筵更頒獸錦宮袍鮮老成效用方自此
如何拂袖翻歸田今晨酌酒送君去行色匆匆留不住
自是平生泉石心不辭萬里關山路到家想值秋暮時
籬邊黃菊猶芳菲親朋歡會如相問為說南還今可期

題孤峯疊秀圖送太守况鍾復任

東南名郡稱姑蘇土壤深厚山縈紆雲中黛色接天目
天際江流瀦具區具區之中峙重屋孤峯高瞰湖波綠
獅岩虎阜相蔽虧紫翠浮光眩人目此中佳景真如畫
閭閻盛世涵清化湖山處處有漁樵隴畝人人樂耕稼
偉哉太守才且賢悉心撫字今幾年鉏奸擊暴植孤弱
詩書比屋聲相傳有時勸農行屬縣露冕輕軒遊歷徧
村童野老競歡迎甘雨和風總如頤比來政譽何洋洋

喜看奏最朝明光
聊賦茲圖慰離別
相期事業齊龔黃

送兵部侍郎徐良玉考滿復任

朝廷圖治臻虞唐
戢戢廊廟登俊良
六卿分理各有屬
大綱一舉衆目張
夏官司馬掌邦政
統制戎師衛民命
任高責重職匪輕
德厚才良始能稱
徐君筮仕當壯年
皇華使節周八埏
為郎粉署著勞績
佐政銀臺承寵遷
金闥出入久通籍
瞻望天顏纔咫尺
惓惓夙夜竭忠誠
烟烟丹心抱清白
先皇擢貳夏官卿
幾年蒞職居南京
提

網挈領百事舉往往群僚推老成
竭來考績覲楓陛書最南還別知已
驛路霜酣木葉丹潞水風高翠濤起
山連岱岳神秀鍾路入徐揚風物同
石城鍾阜自天設虎踞龍蟠今古雄
君歸為政勵初志上副宸衷廣仁治
惟將盛業繼古人終有清名照來世

宋徽宗耕牛圖為黃福少保之子題

春原過雨春日熙春樹連陰春草肥
田家力耕貴及時手挽牛兮肩負犁
草香泉美牛步遲農心汲汲應何為

上恐公家賦稅虧下慮私門妻子饑吁嗟牛兮胡不知
宣和之初能念茲九重燕暇親寫之驕奢一動萬事隳
塞草黃沙千載悲

送許編修歸省

秋風蕭瑟天氣涼梧桐落葉鴻鴈翔詞林有客思故鄉
雙親壽考俱在堂滿頭白髮明秋霜久矣離別各一方
白雲飄飄日飛揚欲往從之道路長朝回幾度心彷徨
東山岌嶮恒在望九重懇懇陳封章拜恩歸去喜莫量

舉桂棹兮理蘭橈錦衣白晝生輝光到家正是籬菊芳
親雖已老身尚強烏紗珠翟相焜煌撾鐘考鼓獻壽觴
願祝千歲猶未央人生此樂應不常於乎人生此樂應
不常聖恩廣大安可忘

送夏仲昭主事歸省

青年射策成名早文采風流出人表校書閒雅在鑾坡
染翰優游趨鳳沼敷歷清華歲月多九重天上沐恩波
粉署初遷司考課石渠還復預編摩從容退食無塵事

時寫琅玕發清思風梢雨葉倏忽成綽有湖州筆端意
高堂慈母雪盈頭定省心勞不自由上疏喜承明詔許
束書便買江南舟難兄解組歸未久相見欣然復攜手
綵衣雙舞壽筵前此樂人間信稀有玉峯秀色似崑丘
乘興還堪載酒遊聖主恩深容暫去鄉園雖好莫淹留

題御史曹習古推蓬清趣圖

青年攬轡臨三吳清宵舉棹經西湖西湖湖上月初出
推蓬對月思林逋逋仙舊宅無人住尚有寒梅千萬樹

老幹槎牙屈鐵垂嫩蕊參差雪花墜暗香細逐東風來
疎影橫斜照綠苔夜深寒氣沁肌骨眼前清絕無纖埃
湖邊又似湘江曲傍有千竿萬竿竹密葉紛如金錯刀
高枝森若琅玕玉雲際何人吹玉笙清音彷彿鸞鳳聲
此君自昔重高節乃與梅花同結盟須臾月落東方白
滿眼猶餘霜雪色道逢四明一老翁為拂生綃洒香墨
筆力精妙意無窮御史冰霜節操同朝回靜坐一披翫
恍在西湖湘水東

送少卿沈民望歸鄉祭掃

雲間自昔多才俊二陸文章著西晉君家兄弟際明時
衰然並以能書進文皇在御渙綸音雙鳳翩翩入翰林
東觀校書延譽盛西清應制沐恩深從此超遷登要地
講殿齋廬常入侍久官庶子輔青宮新拜亞卿居棘寺
四朝寵眷豈徒然染翰今踰三十年曾奉聖言方逸少
還同筆諫效公權優詔初承拜雙闕先塋祭掃歸心切
祖筵群餞出都門正是登高菊花節九峯松柏秋容老

到日遊觀展懷抱鄉閭士子共追陪見者爭誇錦衣好
我念平生故舊情聊歌長句贈君行再三相囑來須早
勉盡忠勤答聖明

竹石圖為都指揮徐信題

長林雨晴露山骨恠狀奇形何突兀有似烟消虎豹蹲
更疑水落龜鼉出修篁落落共幾竿碧玉交映金琅玕
老虬青春露骨角威鳳白日生羽翰吁嗟物情易衰朽
惟此竹石能持久欲看踐履竟何如一片貞堅更相守


題陳進士竹石圖

往時湖郡松雪翁竹石戲墨天下妙即今亦有澹然者
筆意精工頗同調數枝瀟灑自不群高堂白晝生風雲
乃知雅趣脫塵俗何可一日無此君

送葉俊太守致政歸鄉

浙之東兮君所居嗣先業兮宗文儒早年俊邁風骨殊
渥洼颯千里駒一從振足登雲衢才猷卓犖罕與俱
擢宰臨桂向南趨邊氓已喜疲瘡蘇三考績最朝帝都

高超赤縣意自如寸心炯炯冰玉壺榮膺鸚鵡薦分虎符
出守太原民心孚絃誦之聲盈里廬桑麻遍野陰紛敷
夫何未及三載餘翻然乞此衰病軀聖恩霈若雨露濡
告別使我情鬱紆諒君之歸志不孤尊有酒兮架有書
田可耕兮圃可蔬山可樵兮水可漁退休之適安以舒
嗟君之樂兮世所無白雲為侶鷗為徒



文敏集卷五